

# Habakuk

## Bäräpi gänaŋ iritta man

*Habakuk 1:1-3, 2:1-4*

Ämawebe siwoŋi uwä nadäkinik terak it täkaŋ

**1** <sup>1</sup> Man ŋo Yawetä profet Habakukta imaka kubä döpmonken bumik ude imiŋkuk;

<sup>2</sup> Yawe, näk kadäni käroŋi gäkken gera yäk täyat u kadäni jidegän nadäŋ namiŋpäj nin api täŋkentäŋ nimen? Täŋiri imaka waki ahätak u nin nämo täŋpän waneŋ. <sup>3</sup> <sup>a</sup> Näk bäräpi ämawebe äbotken ahäŋirän wari kakta nämo nekaŋ. Unita mebäri imata iwan yabäŋ äwaräkuk täŋiri ämawebe äbot ŋo täŋpä wakaŋ? Komeni komeni ŋo yabäŋira iwantä ämawebe äbot täŋpä wawäpäj tuŋumi bok täŋpä wakaŋ. Täŋpäj yäŋärahut-ärahut ba ämik bumta täŋ itkaŋ.

**2** <sup>1</sup> Näk nadäwätäkna Yawe iwetkuro unita kowata nadäkta yot käroŋi, iwantä äbäŋirän yabäkta punin unu äro itkut. Äro itkaŋ kowata nadäŋkaŋ kaŋ iwera yäŋpäj itsämbut. <sup>2</sup> Täŋira Yawetä näwetkuk; Näkä man döpmonken gäwerayäŋ täyat u mobä kwäkä yäwani ätu yäpmanŋkaŋ uterak säkgämän kudän täŋpäj peŋiri äma kubätä daniwayäŋ nadäŋpänjä bäräŋeŋ täga kaŋpäj api daniwek. <sup>3</sup> <sup>b</sup> Unita jop kudän täŋpäj peyi. Imaka ahäwayäŋ täko unitäŋo kadäni nämo keräp täyak. Upäŋkaŋ kadäni käroŋi nämo iriri kudän gäwoŋärewayäŋ nadätat u api ahäwek. Bäräŋeŋ nämo ahätak yäŋ nadäweno upäŋkaŋ muni kubägän iriri api ahäwek. <sup>4</sup> <sup>c</sup> Man u ŋode; Äma näk mäde ut namiŋpäj kädet waki mebäri mebäri täk täkaŋ u nämo api itneŋ. Täŋ äma siwoŋiwä nadäkinikitä täŋkentäŋ yämiŋirän api itneŋ.

<sup>a</sup> 1:3 Mat 10:16; 2Pi 2:8    <sup>b</sup> 2:3 Apos 1:7; 2Te 2:6-8; Jem 5:7-8; Hib 10:36-37

<sup>c</sup> 2:4 Rom 1:17; Gal 3:11; Hib 10:38